

Ke Aloha Aina – Buke 1, Helu 1
25 Mei 1895

Ke Aloha Aina;
Heaha ia?

O ke Aloha Aina, oia ka Ume Mageneti iloko o ka puuwai o ka Lahui, e kaohi ana i ka noho Kuokoa Lanakila ana o kona one hanau pono.

O ka Ume Mageneti, oia no ka ikaika nana i kaohi i ke kui Mageneti o ke Panana, e hoopolelei ana i kona kuhikuhi i ka welelau Akau o ka Honua nei, a i ka hoku akau hoi.

He mea pohihihi ka ike ana i kahi i loa ai ia mea he ume iloko o ka hao Mageneti, aka, eia ka mea maopopo loa, aia kela kui Mageneti ke hoomau la i kona kuhikuhi ana i ka hoku akau ma ka welau akau o ka honua nei.

Pela ke aloha iloko o ka puuwai o ke kanaka no kona aina hanau pono. Aole i ike maka ia ia mea he aloha, aole hoi hiki ke hoopaaia, aole hoi e hiki ke haha ia; aka, ua laha wale aku oia, a ua lele wale aku a pili i kona aina hanau pono iho, me he ume la o ke kui Mageneti.

I na i hookokoke ia na kui hao Mageneti i kahi hookahi, alaila, he mea maopopo loa me ke kanalua ole o ka manao, ua ume like no lakou a pau loa kekahi i kekahi.

Pela hoi na lahui a me na kanaka a pau loa i noho pihaiia e ka uhane aloha i ka aina hanau. E ike auanei ko lakou huki ana, ume ana, a me ko lakou kaohi ana i ka noho Kuokoa Lanakila ana o ko lakou aina hanau.

Na kela aloha iloko o lakou e hoolilo ia lakou i poai hookahi, e kupaa ana, a e hakoko ana me ka wiwo ole imua o na enemi, e hoao ana e kaili i ko lakou pono Kuokoa. Nolaila, ua lilo ka hune, ka nele, ka inea a me na popilikia he nui i mea ole loa ia lakou. No ka mea, ua nui aku ke aloha no ka aina hanau mamua o na mea e ae a pau loa.

He holoholona ke kanaka ke nele oia i keia ano he Aloha Aina, a i ole ia, he kumakaia paha kona ano like loa. He haahaa loa ke kulana o ke kanaka aloha ole a kumakaia paha i kona one hanau. Aohe ona noonoo hou ia he pono ka i koe iaia, a e maalo ae ana oia iwaena o kona lahui pono iho me ka hoowahawaha loa ia aku e lakou.

[J. NAWAHI]